

Matlamat Umno diperjelaskan

KOTA BAHARU, Ahad — Menteri Kewangan, Tengku Razaleigh Hamzah, berkata setiap rancangan yang disusun oleh Umno adalah berlandaskan kepada prinsip Islam dan dilaksanakan dengan penuh jujur serta ikhlas demi kepentingan rakyat dan negara.

"Umno tidak berpura-pura dalam melaksanakan program-program yang dirancang," ka-

tanya ketika berucap merasmikan pertandingan nasyid peringkat negeri anjuran Pergerakan Wanita Umno Kelantan, di sini malam semalam.

Turut hadir di majlis itu ialah Timbalan Menteri di Jabatan Perdana Menteri merangkap Ketua Biro Agama Wanita Umno Malaysia, Puan Sharifah Doris; Timbalan Menteri Besar, Haji Arifin Said; isteri Menteri Besar, Datin Nik Azizah Ahmad dan Ketua Wanita Umno Kelantan, Tengku Nor Asiah.

Tengku Razaleigh, yang juga Pengerusi Badan Perhubungan Umno Negeri Kelantan, berkata Umno melaksanakan program yang dirangka dengan ikhlas dan terbuka untuk teguran membina oleh orang ramai, khususnya masyarakat Islam negara ini.

Katanya lagi, langkah kerajanya menerapkan nilai-nilai Islam dalam pentadbiran negara membuktikan Umno benar-benar sungguh-sungguh dalam melaksanakan sesuatu

programnya.

Katanya, Umno yakin setiap programnya akan memberi faedah kepada umat Islam di negara ini, walaupun disangsikan oleh setengah pihak.

"Golongan itu menafikan kerja-kerja kita ini sebagai remeh-temeh menyebabkan mereka sanggup mengeluarkan fatwa-fatwa sendiri untuk mempengaruhi orang ramai," tambahnya.

Kemudahan

Beliau berkata, usaha Kerajaan Barisan Nasional yang didokong oleh Umno menubuhkan Bank Islam, Universiti Islam Antarabangsa dan lain-lain membuktikan kesungguhan kerajaan untuk memberi kemudahan kepada umat Islam di negara ini.

Mengenai perpaduan di kalangan umat Islam, Tengku Razaleigh berkata: "Umat Islam di negara ini memerlukan satu pendekatan baru dalam menjamin perpaduan negara."

Beliau menjelaskan, pendekatan baru itu ialah sama-sama menyertai dan berjuang melalui Umno kerana parti itu adalah salah sebuah parti Islam yang terbesar di dunia dan telah menunjukkan buktinya untuk menerapkan nilai-nilai Islam di kalangan masyarakat negara ini.

Bahan asal dari Arkib
Negara Malaysia